

Oqaaseqaatit nalinginnaasut

Akileraarutitigut nalikilliliisinnaanerit maannakkut atuuttut killeqanngivissullu arlaatigut killiliivigineqarnissaannik siunnersuummik Naalakkersuisut, Inatsisartut 2001-imi ukiakkut ataatsimiinnissaanni saqqummiussiniarput.

Selskabit namminersorlutillu inuussutissarsiutillit amerlasuut ukiumut aningaasarsiorfiusumut 2000-imut nammineerluni nalunaarsuiffimmik tunniussinissaminnik allaat 1. juli 2001 tikillugu kinguartitsinikut killeqanngitsumik nalikilliliisinnaanerit aqputigalugit akileraarutitigut amigartooruteqarnermikkut, akileraarutitigut nalikilliliisarnermut maleruagassiat killiliivigineqarnissaannik siunnersuutaajumaartussanik saneqqutaareqqunagit atornerluinnginnissaq pillugu maleruagassiatut maannangaq siunnersuutigineqarpoq, ukiumi aningaasarsiorfiusumi 2000-imi aningaasarsiat akileraaruteqaataasussat naatsorsorneqarneranni amigartoorutit, taakkualuunniit ilaat ukiumi aningaasarsiorfiusumi tassani akileraarutitigut nalikilliliinerunermik pissuteqartut ukiuni aningaasarsiorfiusuni tulluuttuni aningaasarsianit akileraaruteqaataasussanit ilanngaatigineqarsinnaannginnissaat.

Naalakkersuisut pissusissamisoortuusoriunnaarpaat aktie- imaluunniit anpartsselskabimi aktiaatillip anpartiutillilluunniit "akileraaruteqaataanngitsumik" aningaasanik tiguisinnaanissaa. Taamaattumik siunnersuutigineqarpoq aktie- imaluunniit anpartsselskabip aktiatigoortumik anpartitigoortumilluunniit aningaasaataasa ikilisisitaanerannut atatillugu aningaasat aktiaatillip anpartiutillilluunniit pissarsiaasa kiisalu aktiat anpartilluunniit selskabimut pilersitsisuusumut tunineqarneranni pissarsiaasa iluanaarutisiatut isigineqalernissaat. Tassungali atatillugu eqqaamaneqassaaq sinneqartoorutit marloriaammik akileraaruserneqarnaviannngimmata, tassami iluanaarutisiaritineqartut ilanngaatigineqarsinnaammata.

Naalakkersuisut siunnersuutigeqqaaraluagaat, ilaatigut killeqanngitsumik nalikilliliisinnaanernik killiliiviginninnissamik aamma selskabit akileraarutaata procentiata appartinneqarnissaanik imaqartoq ukununnga tusarniaassutigineqarsimavoq; Grønlandsbanken, SparBank Vest, Deloitte & Touche, PricewaterhouseCoopers, Nuna Advokaterne, Advokatfirmaet Wilhelm Malling og Co, Advokatfirmaet Henrik Hey, Kalaallit Nunaanni Sulisitsisut Peqatigiiffiat, HST, ApK, KNAPK, SIK, Kalaallit Nunaanni Inuussutissarsiornermut Siunnersuisoqatigiit, Royal Greenland A/S, Polar Seafood Greenland A/S, Royal Arctic Line A/S, KANUKOKA, Aningaasaqarnermut Pisortaqarfik, Inuussutissarsiornermut Pisortaqarfik, Ineqarnermut, Attaveqarnermut Pilersuinernullu Pisortaqarfik aamma Aatsitassanut Ikummatissanullu Pisortaqarfik. Tusarniaanermi akissutigineqartut tunngavigalugit Naalakkersuisut aalajangerpaat, killeqanngitsumik nalikilliliisarnerit aamma selskabit akileraarutaata procentiata allanngortinneqarnissaat pillugit siunnersuutinik 2001-imi ukiakkut Inatsisartut ataatsimiinnissaanni saqqummiussinissaq siunertaralugu siunnersuutit taakku pillugit inuussutissarsiutilinnik oqaloqateqarnissartik.

Allannguutissatut siunnersuutit maleruagassiatut illersuutissatut isigineqartussaagamik isertitassanut aallaqqaammut sunniuteqassanngillat, aatsaalli aktiatigut imaluunniit anpartitigut aningaasaatit ikilisitaanerannut atatillugu aningaasanik pissarsisitsisoqartillugu akiliinerusoqartassalluni. Isertitassat annertussusissaat missingersuusiormi nalinginnaasumik nalornissutaasartut iluanniinissaat naatsorsuutigineqarpoq. Siunnersuutit allaffissornermut sunniuteqarnissaat naatsorsuutigineqanngilaq.

Aalajangersakkanut ataasiakkaanut oqaaseqaatit

§ 1, nr. 1-imut

Selskabit namminersorlutillu inuussutissarsiuteqartut amerlasuut ukiumut aningaasarsiorfiusumut 2000-imut nammineerluni nalunaarsuiffimmik tunniussinissamik allaat 1. juli 2001 tikillugu kinguartitsinikuugamik, ukiumi aningaasarsiorfiusumi 2000-imi aningaasarsiat akileraaruteqaataasussat naatsorsorneranni pigisamik tamakkiisumik nalikillilernerisigut akileraarutitigut nalikilliliisinnaanerup killiliivigineqarnissaanik maleruagassiassatut pilersaarutigineqartut saneqqutaarsinnaavaat, taamaaliornikkut ukiumi aningaasarsiorfiusumi 2000-imi aningaasarsiat akileraaruteqaataasussat amigartoorutinnngortillugit, taakkulu § 21, imm. 1-imi maleruagassaq naapertorlugu ukiuni tulliuttuni qaninnerni 5-ini aningaasarsianit akileraaruteqaataasussanit ilanngaatigineqarsinnaapput.

Taamatut saneqqutaarisoqarnissaa pinngitsoorniarlugu siunnersuutigineqarpoq, ukiumi aningaasarsiorfiusumi 2000-imi aningaasarsiat akileraaruteqaataasussat amigartoorutitut naatsorsorneqartut, taakkualuunniit ilaasa ukiumi aningaasarsiorfiusumi tassani akileraarutitigut nalikilliliinerunermik pissuteqartut ukiuni tulliuttuni aningaasarsianit akileraaruteqaataasussanit ilanngaatigineqarsinnaannginnissaat, taamaattumillu aammattaaq § 21, imm. 6 naapertorlugu kingumoortumik ilanngaatigineqarsinnaassanatik.

Akileraarutitigut nalikilliliinerunerit tassaapput naatsorsuutitigut nalikilliliinerit qaavisigut nalikilliliinerit. Taamaattumik amigartoorutit naatsorsorneqartut ilaat naatsorsuutitigut nalikilliliinernik pissuteqartut ukiuni tulliuttuni qaninnerni tallimani aningaasarsianit akileraaruteqaataasussanit ilanngaatigineqarsinnaassapput.

Maleruagassaq taanna pissutiginnarlugu selskabit namminersorlutilluunniit inuussutissarsiutillit akileraarutitigut nalikilliliissutissaminnik annaasaqarnissaat siunertaanngimmat, siunnersuutigineqarpoq selskabit inuillu pineqartut akileraarutitigut nalikilliliinerunernik taamaattunik utertitsinissaq Skatterådimit qinnutigisinnaassagaat.

Naatsorsuutitigut nalikilliliinerit akileraartarnermi oqartussaasunit misissorneqarnissaat apeqquserneqarnissaalluunniit siunertaanngilaq, naatsorsuutiviimmi taakkunanilu nalikilliliinerit tunngavigineqartussaapput. Aatsaat

immikkorluinnaq pisoqartillugu naatsorsuutitigut nalikilliliinerit tunngavissaatinnginneqarsinnaapput, tassa soorlu naatsorsuutitigut nalikilliliinerit kukkunersiuisumit nangaanartoqartinneqarsimatillugit. Taamatuttaaq akileraartarnermi oqartussaasut misissuisinnaannginnerat il.il. inunmut atuutsissaaq, aatsaalli pigisat qanoq sivistutigisumik piusinnaaneranut maleruagassat Ukiumoortumik naatsorsuusiortussaataaneranut inatsimmi tunngavigineqartut assingi atorpatigit.

Amigartoorutit ukiumut aningaasarsiorfiusumut 1999-imut siusinnerusunulluunniit tunngassuteqartut § 21, imm. 1-imi maleruagassaaq naapertorlugu ukiunut tulliuuttunut nuunneqarsinnaanerit atuutiinnassaaq, apeqqutaatinnagu amigartoorutit taakkualuunniit ilaat akileraarutitigut nalikilliliinerunernik pissuteqartuunersut, soorluttaaq amigartoorutit taamaattut § 21, imm. 6 naapertorlugu kingumoortumik ilanngaatigineqarsinnaanerit atuutiinnassasoq.

§ 1, nr. 2-mut

Siunnersuutigineqarpoq selskabip aktiatigoortumik anpartitigoortumilluunniit aningaasaataasa ikilisitaanerannut atatillugu kiisalu aktiat anpartilluunniit selskabimut pilersitsisuusumut tunineqarneranni aningaasat aktiaatillip anpartiutillilluunniit pissarsiai iluanaarutisiatut isigineqalissasut, taamaaliornikkut § 70, imm. 1-imi maleruagassat naapertorlugit iluanaarutisianit akileraarutit selskabimit unerartinneqartussanngorlugit.

Aningaasat tunniunneqartut iluanaarutisiatut akileraaruserneqarnerisigut, aktiat ikilisinneqartut sinnerisa pisiarineranni aktiat ikilisisinermit sunnerneqassanngilaq, tassa imaappoq taamaattoqartillugu aktiat ikilisinneqartut pisiarineranni aktiat tassaaginnarpoq aktiat ikilisinneqanngikkallarmata naatsorsorneqartoq.

Selskabip aktiatigoortumik aningaasaatai aktiaatilinnut tunniussinertaqanngitsumik ikilisaappata - soorlu amigartoorutaasimasunik nungutitsinissamik siunertaqarpat - taava iluanaarutisiaqartitsisoqarnaviannngilaq. Taamaalillutik aktiat ikilisinneqartut pisiarineranni aktiat tassaaginnassaaq ikilisisineq sioqqullugu naatsorsorneqartoq.

Selskabimut pilersitsisuusumut aktianik il.il. pineqartunik tunisaqarnermi (allatulluunniit tunniussinermi) tunineranni aktiat tamarmiusoq iluanaarutisiatut isigineqassaaq. Taamaattumik aktiat tunineqartut pisiarineranni aktiat iluanaarutisiat naatsorsorneranni ilanngaatigineqarsinnaanngilaq.

§ 1, nr. 3-mut

Kommunit aamma Akileraartarnermi Pisorta qarfiup iluanni aqqissuussaaneq allanngorartuutuummat, akiligassallip atorfeqarnerminut atatillugu akissarsiaanit akileraarutininik piffissaagallartillugu akilernerneqarsimanngitsunik unerartitseqqusillutik akiligassallip sulisitsisuanik unerartitsisussaataasumik akileraartarnermi oqartussaasut kisimik peqqusisinnaanerit naleqquttuunngilaq. Taamaattumik siunnersuutigineqarpoq kommunit aamma Akileraartarnermi Pisorta qarfiup namminneerlutik aalajangersinnaassagaat ingerlatsiviit suut taama

peqqusisinnaanissaat. Tamatuma kingunerisaanik kommunip akiliisitsiniartarfimmuk akiliisitsiniartartumulluunniit akisussaaffimmik inissiinissaa akornutissaqassanngilaq.

§ 2-mut

Siunnersuutigineqarpoq inatsisip ulloq 1. juni 2001-imiit atuutilernissaa, taamaattorli § 1, nr. 1 ukioq aningaasarsiorfiusoq 2000 aallarnerfigalugu atortuulersillugu.

Aammattaaq siunnersuutaavoq § 1, nr. 2-mi aalajangersakkap inatsisissatut siunnersuutip Inatsisartunut saqqummiunneqarneraniit atortuulernissaa, taamaattorli aalajangersakkap saneqqunneqarsinnaanera Skatterådimit akuersissutigineqarsinnaasunngorlugu.

Saneqqutsisoqarsinnaaneranik aalajangersakkamik siunnersuuteqarnek akileraarusiisarnerup sukaammerneqarnera pillugu maleruagassiamik ilisimannereernikkut atornerluisoqarnissaata pinngitsoortinneqarnissaanik kissaateqarnermik tunngaveqarpoq, aammalu kissaatigineqarmat inatsisissatut siunnersuutip naligiissaarluagaanissaata, suleqatinik avataanilu soqutiginnittunik tusarniaanikkut anguneqarnissaa.

Akileraarusiisarneq pillugu maleruagassap sukaammerneqarnerata eqquinerlunnissaa kissaatigineqanngimmat, Skatterådip akuersissutigisinnaavaa selskabip aktiatigoortumik anpartitigoortumilluunniit aningaasaataasa ikilisitaanerisigut aningaasat aktiaatillip anpartiutillilluunniit pissarsiaasa iluanaarutisiatut isigineqarnissaannik maleruagassiap saneqqunneqarnissaa, tassuunakkut tunniunneqartut taakku akileraaruserneqartussaatinngit, aatsaalli aktiatigoortumik anpartitigoortumilluunniit aningaasaatinik ikilisitsinikkut tunniussisoqarnissaanik aalajangerneq ulloq 23. februar 2001, inatsisissatut siunnersuutip tusarniaassutigineqarfia, nallertinnagu pisimappat Erhvervs- og Selskabsstyrelsimullu nalunaarutigineqarsimappat.

Aktiaatilinnut anpartiutilinnulluunniit tunniussinissamik aalajangerneq ulloq 23. februar 2001 nallertinnagu Erhvervs- og Selskabsstyrelsimut nalunaarutigineqarsimannikkaluarpalluunniit Skatterådi aammattaaq akuersissuteqarsinnaavoq, aatsaalli selskabip uppersarsarsinnaappagu aktiatigoortumik anpartitigoortumilluunniit aningaasaatit ikilisitaanerannut atatillugu aningaasanik aktiaatilinnut anpartiutilinnulluunniit tunniussinissaq ulloq 23. februar 2001 nallertinnagu pisimasoq, kiisalu taama aalajangerneq aktiaatilinnut anpartiutilinnulluunniit, soorlu ataatsimeersuarnissamut qaaqqusinikkut kalerriunneqarsimappat.

Aammattaaq Skatterådi akuersissuteqarsinnaavoq, aktiatigoortumik anpartitigoortumilluunniit aningaasaatit ikilisitaanerannut atatillugu aktiaatilinnut anpartiutilinnulluunniit tunniussinissaq ulloq 23. februar 2001 nallertinnagu aalajangerneqarsimappat, tamatumalu kingorna selskabip kukkunersuisuni eqqartuussissuserisuniluunniit saaffigisimappagu, qinnuigalugulu aningaasaatinik ikilisitsinissaq taanna pappiaqqatigut piareersaqqullugu.

Aktiaatilinnut anpartiutilinnullu tunniussinissamik aalajangerneq ulloq 23. februar 2001 kingoqqullugu aatsaat pisimappat, Skatterådi saneqqutsinissamut immikkorluinnaq ittumik akuersissuteqarsinnaavoq immikkut illuinnartunik, pingaaruteqarlunnartunik patsisissaqartoqartillugu.

Aktiat anpartilluunniit selskabimut pilersitsisuusumut tunineqarneranni aningaasat aktiaatillip anpartiutillilluunniit pissarsiaasa iluanaarutisiatut isigineqarnissaannik maleruagassap saneqqunneqarnissaa, periutsit taakku assingi tunngavigalugit Skatterådip akuersaarsinnaavaa.

Aktiatioortumik anpartitigoortumilluunniit aningaasaatinik ikilisitsinermut atatillugu aktiaatilinnut anpartiutilinnulluunniit tunniussisoqarnissaa ulloq 23. februar 2001 kingoqqullugu selskabimit aalajangerneqarsimappat, imaluunniit aktianik anpartinilluunniit selskabimut pilersitsisuusumut tunisaqarnissaaq ulloq 23. februar 2001 kingoqqullugu isumaqatigiissutaasimappat, aalajangernerit taakku akileraartarneq eqqarsaatigalugu allangortinneqarsinnaapput inatsisissatut siunnersuutip Inatsisartuni saqqummiunneqarnissaa tikillugu.